

Henti ganggu ekosistem Terusan Prangin

Gambar : ALISSALA THIAN

GEORGE TOWN - Ahli Dewan Undangan Negeri (ADUN) Komtar, Teh Lai Heng menasihati orang awam supaya menghentikan sebarang tindakan yang boleh mengganggu dan merosakkan ekosistem Terusan Prangin dekat Taman Bandar Arkeologi Sia Boey di sini.

Beliau berkata, tindakan segelintir pengunjung memberikan makanan kepada ikan-ikan yang dilepaskan di terusan tersebut dikhuatiri mengganggu kestabilan ekosistem selain boleh mencemarkan air.

“Taman ini menyediakan ruang rekreasi yang selesa dan indah serta Terusan Prangin yang direka sebagai “*self-sustaining water body*” untuk memelihara ikan koi dan ikan tilapia serta dapat mengelakkan pembiakan larva nyamuk.

“Namun begitu, ada segelintir pengunjung mula memberi makanan kepada ikan-ikan ini selain melepaskan ikan patin, ikan keli dan kura-kura ke dalam terusan yang mana tindakan ini telah mengganggu kestabilan ekosistem serta mencemarkan air.

“Justeru, saya menyeru kepada semua pihak agar tidak memberikan makanan kepada ikan-ikan ini dan janganlah lepaskan apa-apa (jenis) ikan-ikan baru ke dalam terusan.

“Bersama-samalah kita menjaga taman bersejarah dan bermakna ini dengan menghentikan sebarang tindakan yang boleh merosakkan keindahan serta ekosistem taman,” serunya sejurus mengadakan lawatan tapak dekat sini 7 Disember 2020.

Hadir sama, ADUN Pengkalan Kota, Daniel Gooi Zi Sen serta Pengurus Besar George Town World Heritage Incorporated (GTWHI), Dr. Ang Ming Chee.

Dalam perkembangan berkaitan, Lai Heng memberitahu bahawa projek penyelenggaraan Terusan Prangin yang dijalankan mulai 27 Oktober sehingga 19 November 2020 kini siap sepenuhnya.

Tambah beliau, kerja-kerja penyelenggaraan tersebut yang menelan kos sebanyak RM18,500 dibiayai sepenuhnya oleh Perbadanan Pembangunan Pulau Pinang (PDC).

“Objektif projek ini adalah untuk memulihkan ekosistem serta memudahkan penyelenggaraan Terusan Prangin kelak.

“Selain itu, ia juga bertujuan memulihkan kembali ekosistem dan kebersihan dalam terusan termasuk pembersihan lapisan lumpur tebal yang disebabkan oleh perkumuhan ikan serta pertumbuhan alga.

“Semasa pembersihan dijalankan, ikan-ikan telah dikeluarkan merangkumi lebih 1,400 ikan tilapia; 250 ikan koi; ikan patin (8); ikan keli (4) dan kura-kura (2),” ulasnya.



TEH Lai Heng.



ANTARA spesies ikan yang terdapat di dalam terusan.



KERJA-kerja pembersihan Terusan Prangin dekat Taman Bandar Arkeologi Sia Boey giat dijalankan di sini.

Pemulihan industri perhotelan jangka ambil masa



KHOO Boo Lim.

SEJAK Kerajaan Persekutuan mengumumkan Perintah Kawalan Pergerakan (PKP) pada Mac 2020, ramai dalam kalangan penggiat industri perhotelan di negeri ini terutamanya mulai gusar.

Banyak tempahan bilik serta acara dan majlis mula dibatalkan menyebabkan kedudukan kewangan berada dalam taruhan. Lebih mencabar apabila ada pemilik hotel perlu membuat pertimbangan sama ada untuk mengekalkan jumlah kakitangan yang sama atau tidak.

Mantan Pengerusi Persatuan Hotel-Hotel Malaysia (MAH) Pulau Pinang, **KHOO BOO LIM** sempat berkongsi pengalaman dan situasi semasa yang dihadapi oleh penggiat industri perhotelan di negeri ini.

“Sebelum ini, sepanjang tempoh PKP dan PKP Pemulihan (PKPP), industri perhotelan di negeri ini sememangnya bergelut untuk memastikan kekal beroperasi.

“Namun, segalanya bergantung pada situasi penularan wabak kerana apabila pembukaan semula sektor pelancongan domestik pada Jun lalu, ada hotel-hotel yang kembali rancak.

“(Dan) sukar dijangkakan sehingga bila (penularan COVID-19) berlanjutan, mungkin sehingga pertengahan tahun hadapan, semuanya bergantung pada permintaan pasaran domestik memandangkan pergerakan ke luar negara tidak dibenarkan,” ujarnya ketika ditemui baru-baru ini.

Menurut Boo Lim, pemulihan industri perhotelan dijangka akan mengambil masa yang lama untuk kembali stabil, bergantung pada situasi semasa.

“Bagi pihak hotel-hotel pastinya kita berharap tidak berlaku gelombang baharu penularan wabak COVID-19 kerana sejak sembilan bulan lalu industri ini mengalami kerugian berjuta-juta ringgit.

“Maka, ada dalam kalangan pemilik hotel yang mengambil inisiatif dan bertindak kreatif dengan menawarkan potongan harga yang menarik untuk penginapan.

“(Dan) memandangkan penganjuran acara dan majlis amat terhad, ada dalam kalangan mereka yang turut menjual hidangan yang dihidangkan di hotel kepada umum bagi memastikan penyelenggaraan, keselamatan, kebersihan serta kelangsungan hotel mereka terjamin,” katanya yang berharap agar Kerajaan Persekutuan dapat memberi lebih banyak insentif untuk industri ini terus ‘bernafas’.

Bantu penjaja kecil pasca COVID-19

Oleh : WATAWA NATAF ZULKIFLI

BATU LANCANG - Kerajaan Negeri mengumumkan pelbagai pengecualian bayaran kutipan hasil serta bantuan jangka pendek bagi kemudahan golongan terkesan akibat Perintah Kawalan Pergerakan (PKP) dan pandemik COVID-19.

Justeru, Exco Perumahan, Kerajaan Tempatan, Perancangan Bandar & Desa, Jagdeep Singh Deo menggesa supaya Kerajaan Persekutuan turut mengambil pendekatan sedemikian khususnya kepada golongan terjejas khasnya komuniti penjaja.

“Apabila pelaksanaan Perintah Kawalan Pergerakan Bersyarat (PKPB) diumumkan, pihak-pihak berkaitan perlu sediakan bantuan untuk membantu golongan yang terkesan.

“Oleh demikian, saya menyeru Kerajaan Pusat untuk membantu golongan memerlukan seperti penjaja kecil yang mana kita lihat tapak-tapak

penjaja sudah kosong dan mereka ini merupakan golongan terjejas (daripada segi pendapatan harian).

“Kalau hendak buat PKPB mesti ada pelan bantuan kepada mereka, saya juga ingin tahu apakah pelan (jangka pendek, jangka sederhana dan jangka panjang) untuk golongan ini (penjaja) daripada Kerajaan Pusat kerana mereka juga bayar cukai,” ulasnya dalam satu sidang media yang diadakan sejurus lawatan ke Mewah Court bagi mengumumkan kelulusan permohonan kerja-kerja penukaran 16 unit tangki air di sini 24 November 2020.

Turut serta, Ahli Dewan Undangan Negeri (ADUN) Batu Lancang, Ong Ah Teong; Ketua Penolong Setiausaha Kanan Bahagian Perumahan Pejabat Setiausaha Kerajaan Negeri, ‘Ainul Fadhilah Samsudi; Penolong Setiausaha Kanan (Seksyen Pengurusan Perumahan) Bahagian Perumahan Pejabat Setiausaha Kerajaan Negeri, Mohd. Fauzy Mohd. Yusoff dan Pengerusi Badan Pengurusan Mewah Court, D. Emmanuel.

Mengulas mengenai kelulusan permohonan Mewah Court, Jagdeep menyatakan bahawa Kerajaan Negeri menanggung 80 peratus daripada keseluruhan kos projek iaitu bernilai RM374,400, manakala baki 20 peratus (RM93,600) oleh Badan Pengurusan Mewah Court.

“Projek tersebut dijangka mengambil masa selama lapan minggu untuk disiapkan,” ujarnya.

Sebagai rekod, Jagdeep memaklumkan bahawa melalui lima tabung perumahan yang diwujudkan, Kerajaan Negeri sudah membelanjakan sebanyak RM262.76 juta bagi projek-projek penyelenggaraan di semua perumahan awam dan swasta seluruh negeri Pulau Pinang.

“Di bawah Tabung Penyelenggaraan Maksimum 80 Peratus Pulau Pinang (TPM80PP), sebanyak RM38.2 juta telah dibelanjakan oleh Kerajaan Negeri Pulau Pinang meliputi 257 permohonan dengan jumlah kerja yang terlibat adalah sebanyak 411 kerja,” jelasnya.